

PIMPINAN 2MYYANG MEMIKAT

BW 11 APR 1981

MUNGKIN Allah telah menunjukkan jalan yang sewajarnya kepada Datuk Seri Dr. Mahathir Mohamad untuk mentadbirkan negara ini yang menyebabkan sdr Annuar Ibrahim turut terikut, kerana jalan yang dilalui oleh Perdana Menteri itu adalah juga jalan yang sentiasa dicari dan dipohon dan ingin dirintis dan dilalui oleh sdr Annuar Ibrahim.

Ramai yang memuji Datuk Seri Dr. Mahathir kerana kejayaannya menarik sdr Annuar Ibrahim menyertai UMNO. Annuar Ibrahim dikatakan seorang pemimpin yang berpegang teguh kepada prinsip perjuangan dan tidak akan mudah dipujuk rayu. Ini ditegaskan sendiri oleh ayah dan ibunya.

Dalam zaman pentadbiran Tun Abdul Razak, Annuar pernah ditawarkan beberapa jawatan penting yang bergaji besar, tetapi semuanya ditolak dengan alasan belum sampai masanya. Tetapi apabila 'dipelawa' oleh Dr. Mahathir, maka sdr Annuar terus memikirkan secara positif.

Peristiwa 'Kejayaan Dr. Mahathir dapat disamakan atau hampir-hampir sama dengan kejayaan Presiden Ramon Magsaysay (Filipina) memujuk Lui Taruc, pemimpin Hukbalahap yang menentang pemerintah di sekitar tahun-tahun 1940-an dan 50-an.

Perbezaannya ialah sdr Annuar sebagai pemimpin yang berlandaskan Islam, sebaliknya Lui Taruc adalah pemimpin Hukbalahap yang asas perjuangannya Komunisme.

Pemimpin-pemimpin Filipina sebelum Magsaysay telah cuba menawan hati Taruc dan gagal, tetapi cara dan tindakan Magsaysay telah berjaya menarik Lui Taruc makan bersamanya dan terus menghentikan perjuangan Hukbalahap.

Penyertaan Annuar dalam Barisan Nasional bukanlah disebabkan oleh individu yang mempengaruhinya. Mengikut sumber yang tertentu, Tun Abdul Razak, Datuk Asri dan ramai pemimpin tanahair yang lain telah menemui dan 'memujuknya', tetapi tidak begitu berjaya.

Berdasarkan kepada hakikat ini, jelaslah bahawa sdr Annuar tidak mudah terpengaruh dengan pujukan pemimpin-pemimpin, tetapi sebaliknya akan tertarik dengan apa yang dilakukan atau yang akan dilaksanakan oleh pemimpin-pemimpin berkenaan.

Sdr Annuar Ibrahim pasti tertarik dengan cara pimpinan Dr. Mahathir dan sikapnya yang sentiasa menggalakkan agar orang Islam sentiasa bekerja keras untuk mencapai kejayaan di dunia dan akhirat.

Tindakan Dr. Mahathir menghapuskan rasuah dan mengharapkan sebuah kerajaan yang bersih, di samping berusaha

menghapuskan kemiskinan dan mengurangkan jurang antara yang miskin dengan yang berada adalah juga merupakan asas-asas perjuangan Islam.

Mungkin tidak pernah wujud dalam sejarah pentadbiran di Malaysia seorang pemimpin tertinggi dengan lantang mengeluarkan kata-kata yang agak kesat yang ditujukan kepada pemimpin-pemimpin bekas tanah jajahan seperti pernah dilakukan oleh Dr. M dan Datuk Musa Hitam. Tindak-tanduk kedua-dua pemimpin ini terhadap Barat, khususnya British, telah membuka mata setengah pemimpin dunia.

Dr. M pernah melahirkan fikirannya dalam bukunya 'The Malay Dilemma' bahawa penjajahan Britishlah yang menjadi punca utama orang Melayu dalam dilema. British pernah dan beberapa kali menempelak dengan mengatakan bahawa orang Melayu malas.

Jadi mengikut Dr. M, kalau British boleh menyatakan begitu dan dengan lantang pula, mengapa pula kita tidak boleh berbuat demikian. Mengapa kita dikritik apabila menyafakan sesuatu keburukan mereka, tambahan pula apa yang diperkatakan itu betul.

Dasar dalam dan luar negeri yang dilaksanakan oleh Dr. M dewasa ini agak menyimpang dari dasar yang diketengahkan oleh ketiga-tiga pemimpin negara yang lalu, terutamanya dasar yang tidak bertukar ke Barat. Sebaliknya dasar yang dipopularkan oleh Dr. M ialah berpaling ke Timur.

Dr. Mahathir merasakan tidak ada ertinya negara kita membeli barang-barang British dengan harga yang mahal jikalau dengan berbuat demikian akan menggalakkan lagi kenaikan gaji pekerja dan menambah kemalasan.

Tindakan Perdana Menteri yang agak mengemparkan dunia ialah keengganannya menghadiri persidangan negara-negara Komanwel yang mana pada masa lampau dianggap oleh Malaysia sebagai pertubuhan yang agung.

Walaupun timbul kecaman dan kutukan dari negara-negara lain yang menganggotai Komanwel terhadap sikap Perdana Menteri, terutama dari Australia (yang mana sebuah stesen pemancar di Queensland telah mengeluarkan kenyataan yang kurang enak mengenai sikap PM pada 4 September 1981), namun Datuk Seri Dr. Mahathir tetap berkeras dan sentiasa berpaut pada pinsip perjuangannya.

Dilaporkan, ada beberapa perkara yang me-

Imee Marcos, anak kepada Presiden Marcos (Filipina) yang bersama ayahnya menyertai 'North-South Summit', di Cancun, pada bulan Oktober tahun lalu telah memaparkan mengenai sikap setengah-setengah pemimpin dunia yang menghadiri persidangan itu.

Beliau terkejut dan hairan melihat telatah Presiden Francois Mitterrand dari Perancis yang sibuk menulis poskad dan membelek-belek 'brochure' pelancongan yang mana pada ketika itu persidangan sedang membincangkan tentang bantuan-bantuan yang harus diberikan oleh negara berada kepada yang tidak berada.

Mungkinkah keadaan yang serupa itu telah diramalkan oleh Dr. M akan berlaku di Persidangan Komanwel? Walau apa pun tuduhan dan tohmah yang cuba dilemparkan terhadapnya, namun PM terus dengan sikapnya.

Kerajaan British mungkin bergegar juga dengan tindakan Permodalan Nasional Berhad (PNB) yang mendapat sokongan kewangan dari Kerajaan, membeli sebahagian besar saham Guthrie yang British anggap sebagai 'dawn raid' atau 'serangan waktu fajar'.

Sebenarnya saham Guthrie telah dibeli secara peraturan biasa di pasaran saham berdasarkan cara dan peraturan perniagaan saham dan dikira sebagai sah. Tambahan pula pemegang sahamnya menjualkannya dengan rela hati, tertarik dengan harga tinggi yang ditawarkan. Dengan cara demikianlah saham-saham Guthrie bertukar tangan kepada PNB.

Suratkhabar di Britain menganggap tindakan Kerajaan ini sebagai 'back-door nationalisation' atau 'pemiliknegeraan mengikut pintu belakang', tetapi akhbar The New Straits Times Malaysia terus membidas dengan menyatakan bahawa Kerajaan Malaysia dalam sejarahnya tidak pernah memiliknegerakan walaupun sebuah syarikat asing yang ada di Malaysia.

Tetapi kalau kita menungkan dan pandang ke zaman silam, apakah kita terusik benar dengan tuduhan 'dawn-raid' dan beberapa tuduhan lain yang dilemparkan oleh British kepada negara kita, dibandingkan dengan tindakan mereka, tegasnya Syarikat Hindia Timur Inggeris, merampas Pulau Pinang dari Sultan Kedah (negeri tempat lahir Dr. Mahathir), pengambilan Singapura oleh Raffles pada tahun 1819 dari Sultan Hussein Johor (negeri tempat lahir Datuk Musa Hitam) dan membuat beberapa perjanjian lagi secara tipu-helah dengan negeri-negeri Melayu.

nyebabkan PM kurang senang dengan tindakan pertubuhan dunia itu. Antaranya ialah:

1) Sifat persidangan itu yang lebih banyak bercakap dari bekerja yang mana pada pendapat Datuk Seri Dr. Mahathir lebih mengunggulkannya berada di Malaysia dari membuang masa menghadiri persidangan itu.

2) Persoalan tentang kenaikan yuran pelajaran di Britain, yang mana penuntut-penuntut Malaysia adalah yang paling ramai di sana berbanding dengan penuntut-penuntut dari negara lain di luar Britain.

Pentadbiran British telah mengenakan yuran yang begitu tinggi terhadap penuntut-penuntut dari negara-negara yang tidak tergolong dalam kumpulan Pertubuhan Negara Ekonomi Eropah (EEC).

3) Keengganan British membenarkan Syarikat Penerbangan Malaysia (MAS) menambahkan lagi penerbangannya ke London.

4) Kedinginan sambutan negara-negara maju dalam bidang perindustrian untuk memberi bantuan teknikal sepenuh hati kepada negara-negara yang sedang membangun, terutama negara-negara di Asia Tenggara.

Agak tidak kurang mengejutkan dunia ialah kenyataan PM yang menyatakan tidak ada keikhlasan dari pihak negara-negara 'Utara' untuk membantu negara-negara 'Selatan' dari aspek kemajuan ekonomi. Kenyataan ini dikeluarkannya dalam hubungan dengan persidangan 'Cancun' yang diadakan di Mexico tidak lama dulu.

Alasan yang telah dikemukakan oleh PM ialah berhubungan dengan penjualan stok bijih timah oleh Amerika Syarikat.

Amerika Syarikat sedar bahawa ketika itu bijih timah bukan berkurangan di pasaran dunia, namun demikian Amerika Syarikat terus berdegil dan mengedarkan stok simpanannya di pasaran.

Kesannya ialah kejatuhan harga bijih timah di pasaran dunia yang kesan langsungnya ialah terhimpitnya ekonomi Malaysia.

Tidakkah Amerika Syarikat sedar bahawa Malaysia sebagai sebuah negara 'Selatan' sangat bergantung kepada bijih timah sebagai sumber pendapatan negaranya?

Oleh itu, di manakah letaknya keikhlasan negara-negara 'Utara' yang kononnya ingin membantu negara-negara 'Selatan' yang sedang membangun itu?

Apakah British tidak sedar ataupun pura-pura lupa dengan 'raid' yang telah dilakukannya itu?

Kesan dari tindakan PNB menguasai Guthrie menyebabkan Britain terpaksa meminda Undang-undang Pasaran Saham di London, yang sememangnya ditujukan untuk menyakitkan hati kita.

Berikutan dengan itu, Dr. M telah mengeluarkan arahan kepada semua jabatan Kerajaan Malaysia agar membeli barang-barang keluaran Britain apabila difikirkan amat perlu. Segala pesanan hendaklah dibuat melalui Jabatan Perdana Menteri.

Rupa-rupanya tindakan Dr. Mahathir itu telah menyebabkan Lord Carrington meluru datang ke Malaysia untuk berjumpa dengan Perdana Menteri merundingkan beberapa perkara kepentingan bersama.

Kehadirannya selama tiga hari di Malaysia (hanya dalam waktu yang singkat berkesempatan menemui PM). Dr. M telah dapat sebanyak sedikit memulangkan paku buah kerasnya kepada wakil British itu mengapa dia bersikap demikian terhadap Britain.

British atau lebih tegas lagi saudagar-saudagar British di sini cuba mengabaikan hasrat Kerajaan untuk menyusun semula ekonomi masyarakat Malaysia melalui Dasar Ekonomi Baru (DEB).

Saudagar British yang berkepentingan di Malaysia pura-pura tidak mengerti tentang hasrat Kerajaan menuju matlamat membahagikan kekayaan negara ini sebanyak 30% kepada Bumiputera pada tahun 1990 dan kaum-kaum lain 40% dan yang baki 30% adalah untuk pemodal asing.

Bukan sahaja saudagar-saudagar British tidak mahu menyokong dasar ini, malah mereka jadi petualang kepada perlaksanaannya. Mereka cuba mengeneipkan kewujudan golongan peniaga (pengusaha) Bumiputera, tetapi sebaliknya mereka bekerjasama rapat dengan kaum-kaum lain, seperti yang berlaku dalam zaman pemerintahannya dulu.

Agak tepat kata Datuk Musa Hitam yang cuba mengingatkan British bahawa masanya telah berlalu apabila 'tuan' masih berleluasa di sini. Tetapi, sayangnya masih ada lagi ahli-ahli lembaga pengarah ladang-ladang kepunyaan British yang menganggap negara ini sebagai Malaya.

Ramal pula yang berpendapat mengatakan bahawa kita tidak boleh mentadbirkan negara ini dan kononnya lama kelamaan negara akan hancur berkecal.

Segala tindak-tanduk 2M mungkin telah diperhatikan dengan penuh minat oleh sdr Annuar Ibrahim. Seolah-olah segala soalan yang sentiasa menentang benaknya beberapa lama dulu telah terjawab sendiri dengan tindakan dua individu agung ini.

Dalam masa perjuangannya, sama ada di universiti sebagai pemimpin Persatuan Bahasa Melayu Universiti Malaya ataupun sebagai pemimpin Persatuan Kebangsaan Pelajar-pelajar Islam Malaysia (PKPIM) atau ABIM, sdr Annuar selalu meletakkan asas Islam sebagai 'priority' dalam apa jua hal.

Di samping itu, beliau selalu melaungkan suara hatinya tentang penubuhan universiti Islam. Slogan-slogan seperti 'perjuangan berdasarkan kepada conscience of the majority' sentiasa keluar dari mulutnya.

Jadi, segala hasrat, cita-cita yang dildamkan itu telah cuba dirintis oleh Dr. Mahathir. Kesannya ialah Allah telah membuka hati dan mendorong pemimpin muda ini tampil ke hadapan bersama seiring jalan dengan pemimpin tercinta memikul tanggungjawab menuju ke arah yang satu. Moga-moga diberkati Allah.

Di antara Annuar dan Dr. M memang banyak persamaan latarbelakang. Ini telah diakui sendiri oleh sdr Annuar dalam masa temuramah di TV tempoh hari dan tentunya kenyataannya disetujui oleh Dr. M. Semasa menghadapi pergolakan dalam peristiwa 13 Mei, Dr. M dan sdr Annuar telah sama seiring jalan.

Dr. M dan Datuk Musa telah disingkirkan dari UMNO kerana perselisihan pendapat dengan Tengku Abdul Rahman, Perdana Menteri pada ketika itu. Dengan lain perkataan, 2M telah mengalami nasib yang sama sebelum sampai ke puncak.

Dan sdr Annuar yang pada ketika itu masih di universiti turut menyokong perjuangan dua tokoh itu, walaupun pada ketika itu ia belum dikenali ramai.

Pada mulanya ramai berpendapat bahawa Dr. M dan Datuk Musa lebih condong kepada membela nasib orang Melayu dan akan membiarkan kaum-kaum lain.

Begitu jugalah anggapan ramai orang terhadap sdr Annuar Ibrahim. Malah sdr Lim Kit Siang sendiri telah membuat perhitungan yang agak silap tentang sikap 2M setahun yang lampau, berbanding dengan apa yang terlihat dan dilakukan oleh 2M.

Sdr Lim pernah mengatakan bahawa 2M telah menimbulkan keraguan di kalangan orang bukan Melayu. Ia juga berharap 2M sedar tentang hal ini dan mereka hendaklah berhati-hati dalam apa jua tindakan, agar pimpinannya untuk rakyat keseluruhan.

Keraguan sdr Lim ini juga telah terjawab melihat tindakan pemerintahan 2M.

Mereka tidak mengira bangsa dan keturunan. Keraguan oleh bukan Melayu terhadap DEB juga terhapus apabila mereka dijelaskan dengan seikhlas-ikhlasnya tentang dasar dan falsafah DEB.

Sekiranya masih ada bukan Melayu yang masih mempersoalkan tentang DEB, dengan sendirinya mereka sengaja tidak mahu faham tentang dasar itu dan layak dipanggil anti-nasional.

Menyentuh tentang pimpinan 2M lagi, pernah beberapa orang ahli UMNO menyuarakan kebimbangan mereka tentang 'kelajuan' pentadbiran sekarang.

Datuk Hussein Onn mengambil masa 50 hari untuk mengumumkan kabinet barunya selepas beliau memegang jawatan Perdana Menteri pada bulan Januari, 1976. Ini agak berbeza dengan Dr. M yang mengumumkan susunan kabinetnya dua hari selepas dia mengangkat sumpah sebagai PM pada 16 Julai, 1981.

Dr. M memang pernah menegaskan bahawa pentadbirannya adalah berbeza bukan dari segi dasar, tetapi dari segi penumpuan dan cara.

Dugaan awal yang dihadapi oleh Dr. M ialah berhubung dengan KGB. Siddiq Mohamed Ghaus yang ditangkap pada 13 Julai, 1981 ialah Setiausaha Politik Dr. M., semenjak Dr. M dilantik menjadi Menteri Pelajaran lagi.

Dr. M terus mengambilnya berkhidmat apabila beliau menjadi TPM pada tahun 1976 sehinggalah beliau tertangkap kerana terlibat dengan agen Komunis Russia.

Sehingga ini, segala dugaan dan tindakan Dr. M telah dapat diatasi. Walaupun ada yang meragui kepimpinan Dr. M, namun ramai menganggap Dr. M sebagai pemimpin tulen. Ini ditambah pula dengan kejayaannya 'menjempit' sdr Annuar Ibrahim menyertai UMNO.

Dan bagi diri sdr Annuar Ibrahim pula, mungkin merasakan perjuangan dari luar tidak mendatangkan apa-apa kesan seperti yang telah dialaminya semasa menjadi Presiden ABIM dulu dan sebaliknya idealism telah diperjuangkan oleh Dr. M dan menampilkan kesan positif. Jadi, kemasukannya dalam UMNO tidak bererti bahawa beliau telah mengorbankan prinsip perjuangannya malah, telah menambahkan kukuh lagi. ■